

Le dotur Eduard Agreiter é demez en chëst'edema dai 18 ai 22 de messé.
Al vëgn sostituì dala doturia Grete Mahlknecht 349 06 67 034.


PLOANIES DA SAN MARTIN Y DA LUNGIARÜ

Stimades comunités de ploania,
cun i 31 de messé lascia siur Paul les cöres de Antermëia y Rina; al dá ince jö la incaria da curat d'Al Plan, La Pli, San Martin y Lungiarü, y vá tla Ciasa de Palsa a San Martin. Chësta é na dezijiun che nosc vësko Ivo á tut adöm cun siur Paul. I rengraziun siur Paul por le sorvisc da ploan y curat ch'al á fat por tröc agn. Orun ester unis a d'el cun nosta oraziun. *Le ploan siur Klaus*

Invit al referat „Ester bugn da se daurí al forest. L'ejëmpl de Ojöp da Oies“ cun Agnes Irsara y Carlo Suani en lönesc ai 18 de messé dales 10.00 ales 12.00 sö Oies dan la ciasa nadalina de Ojöp Frëinadamez. Tres la recostruziun dla vita y dl'opera de siur Ujöp Frëinadamez, gnarál presenté la testimonianza de vita de na porsona che á salpü da ti jí adincuntra ai atri, da azeté d'atres cultures y da s'adaté al forest.

Presentaziun dl teater musical „Ujöp da Oies“, alaleria, é ai 22 vëndres, 23 sabeda, 27 mercui, 29 vëndres y 31 sabeda de messé, vigni iade dales 21.00. Prenotede i posc por internet sot a www.musicaloies.it o por telefon 371 56 88 564 y an pó paié diretamënter pro la cassa. *plü avisa tl'ultima plata.*

L'Istitut Ladin ves inviëia dër bel ala daurida dla mostra dl scultur fascian Matthias Sieff, en vëndres, ai 22 de messé dales 18:00 tl salf dl Istitut Ladin a San Martin. La mostra é daverta dai 23 de messé cina ai 7 d'agost dales 10.00 – 12.00 / 15.00 – 19.00.



Ai 22 de messé vëgnel recordé santa Maria Magdalena che vëgn nominada ti vangeli Maria da Magdala. Ara é öna dles ëres plü importantes tl Testamënt Nü. Te deplü vangeli vëgnel cunté ch'ara é dlungia la crusc de Gejú, ch'ara é pro süa sopoltöra y che en Pasca dadoman ti á Gejú dé, sciöche pröma testemona, l'inciaria da jí dai discepuí a ti cunté la noela dla ressureziun. I Peri dla Dlijia, ti pröms secui do Gejú Crist, la nominâ „Apostola apostolorum“. Dedô éra gnüda n pü' desmentiada ia y l'ann 2016 éra gnüda alzada dal papa Francësch ala medema dignité di apostui. I podun jí plëgns de confidënza da d'ëra che ti é propi stada dlungia a Gejú, te süa vita, te süa mort y do süa mort.



Plata dles Ploanies San Martin y Lungiarü

ploan siur Klaus Sottsas 344 15 54 055 - ksottsas@rolmail.net
curat siur Heinrich Perathoner 339 65 74 213
redaziun: anton.gasser@rolmail.net - 348 27 44 517 / 0474 523 194



<https://www.valbadiaonline.it>

17.07. - 24.07.22 nr. 34

ultimo termo por comunicaziuns: jöbia, dales 20.00

16ª DOMÈNIA IA POR L'ANN C

Vangele do Lüca 10,38-42

Te chël tēmp é Gejú rové te n paîsc, y na ëra, che â inom Marta, l'â tut sö döt valēnta te süa ciasa. Ara â na só che â inom Maria. Maria s'â senté pormez ai pîsc dl Signur y ti ascutâ pro a sües parores. Marta indere ê döt ocupada da le socodì. Ara ti é jüda pormez y â dit: Signur, ne t'un fêjeste nia d'infora che mia só me lascia döt le laûr a mé sóra? Dii pô ch'ara me dëides! Le Signur à respognü: Marta, Marta, tö te fejes n gröm de fistidi y de bries. Mâ öna na cossa va debojëgn. Maria à lité la miù pert, chësta ne dess nia ti gnì tuta.



Ci é pa veramënter debojëgn? De ci vára pa tla vita? De jënt? O de cosses? Sc'i conesciun Gejú plü sot, s'intenunse che le raport cun la jënt ti stá dër a cör. Ara se trata dl tēmp ch'i ti dun a na porsona, nia dl tēmp ch'i ti dun a cosses. Avëi l'abitaziun bel romendada sö, avëi da tēne sö da mangé y da bëre, val' da bocolé, y spo ciamó val' de duc dedô. Döt chësc é bun y dërt, mo nia le plü important. L'essenzial é incunté y sté pro la porsona che é por le momënt chiló. Mo sce les cosses secundares devēnta essenziáles, sce le fistide por les cosses incëria devēnta plü important co la orenté da incunté le divin che é tla jënt, spo é val' che ne stimenëia nia. Marta n'â nia capí l'essenzial dla incuntada. Gejú ti al dá da capí: Ester deplëgn presēnc sēgn y chiló por la conferta. Na dërta incuntada n'adora nia boandes y spëises, mo le cör davert y se tó dlaurela. Al ó ester atenziun, respet, presēnza. Tö es chiló y iö sun chiló por te. Imaje

EDEMA	SAN MARTIN	LUNGIARÜ	Oraziun por la Ucraina y la Ruscia, por l'Europa y le monn.
17.07.22 16 ^a Domënia ia por l'ann C	9.00 Corona 9.30 Gran Mëssa por la Comunité + + Purgl y Irene Prousch Benedisciun dl tëmp	7.50 Corona 8.15 Gran Mëssa por la comunité Benedisciun dl tëmp 15.00 Corona tla capela de S.Ojöp Fr.	Nosc Pere sö al cil tö os ester pere y uma por döta la jënt tla Ucraina y tla Ruscia, tl'Europa y te döt le monn al sides santifiché to inom sc'i te portun respet, amur, onur y gloria a te, ti portunse a düc varijun y salvëza al vëgnes to rëgn te chël ch'i se dun da fá por la iustizia y la pesc túa orenté sides fata dëidesse da mëte le comerz, le capital, i governs a sorvisc de tua orenté sciöche sö al cil insciö söla tera por amur dl cil fá ch'i ti dunse ala tera n müs plü uman dásse incö nosc pan por chësc dé insëgnesse da le partí che düc ais incö so pan pordónesse nüsc piciá fá ch'i odunse ite nostes colpes y dëidesse da se tigní a tua orenté sciöche ince nos ti pordenun a chi che nes á ofenü fá ch'i se pordenunse un al ater, por ch'i sunse bugn da jí por trus nüs y no se mené tla tentaziun fásse stersc ch'i ti tignunse bot ales tentaziuns dla potënza y dla richëza mo delibrëiesse dal mal scínchesse la dërta liberté ch'i podunse porté pro a na buna vita por düc deache to é le rëgn, tua é la potënza y la gloria por dagnora Amen láscesse confidé en te y tö pert a tua forza y a tua gloria.
18.07.22 Lönesc Arnold, Aurea			
19.07.22 Marina, Iusta y Rufina Dedolönesc	19.00 Mëssa + Hermann Burkia y + + Pescosta + Carolina Perathoner		
20.07.22 Margareta, Aron Dedemesaledema		7.30 Mëssa en onú de Santa Lizia + Nando Clara por les Püres Animes	
21.07.22 Jöbia Daniel, Laurënz	degöna mëssa		
22.07.22 Maria Magdalena Vëndres		7.30 Mëssa + Heinrich Frenademez y + Ida Clara Verginer	
23.07.22 Brighita dla Svezia Sabeda	20.00 Mëssa prefestia de reng. fam. Stefan y Sara Zingerle dl ann + Maria Alfreider Zingerle + Erna Frenner	18.30 Mëssa prefestia + + Emilia Frenes aniversar + Zilia Dapoz	
24.07.22 17 ^a Domënia ia por l'ann C Domënia de San Cristofer	9.00 Corona 9.30 Gran Mëssa por la Comunité Oferta por les Misciuns + + Cristina y Franz Conrater + Tone Pedevilla (dl ann) Benedisciun dl tëmp	7.50 Corona 8.15 Gran Mëssa por la comunité Oferta por les Misciuns Benedisciun dl tëmp 14.00 Bato de Lena Valentin 15.00 Corona tla capela de S.Ojöp Fr.	
 Uniun di Ëi: En domënia, ai 24 de messé, tignunse la Domënia de San Cristofer. Chësc Sant nes inviëia da ciaré sura l'ur de nosc taí fora. I orun rengrazié de vigni iade ch'i sun gnüs portá y sconá da prighi. Nosc dilan podunse desmostré cun le partí cun chi che á tla vita de gragn pëisc da porté y cun le sostëgn de chi che dëida la púra jënt tles teres dala meseria. Ai ti porta Gejú Crist y devënta instësc Cristofers: al é nostes miscionares y nüsc miscionars cun sües colauradësses y sü colauradus. Al gnará partí fora na medaia y lapró na cherta cun informaziuns y la oraziun a San Cristofer. L'Ofize dles Misciuns y le Movimënt Catolich di Ëi ves dij bele sëgn n bel dilan de osta oferta.			